

SCHNITZELBÄNK 2005

VO DE SCHWARZE

Das Zeiche heisst nid Victory,
So blöd cha nid mal der Ackerma si,
S'heisst o nid Peace, sondern ziemlech stier:
„Fröilein bringet no zwöi Bier!“

Auto-Crash und Thonsalat,
Mietzinsaffäre, Merz-Dienstfahrt,
Us de Fettnäpf geng der gröscht uswähle,
Chlous, üs Bänkler wirsch Du fähle!

Chräje gäbs schiins meh als gnue,
Doch üs löh die Viecher scho lang i Rueh,
Mir hei – dä Trick isch schnäll verzellt –
Als Voguschüchi d'Zölch i Garte gstellt.

Ig ha zwe Wuche hert trainiert,
Scho het mi der Köbi nominiert,
Obschon ig gar nid schutte cha.
S'chunnt halt uf e Speuz drufa !

Der Blocher als Puur, der Murer als Chnächt,
Der Schmid als Verdingbueb,
Das wär nid so schlächt.
Für die nächschi Staffle Fernsehqual
Us em Saleweidli im Ämmital.

Der Tschäppät chunnt nach de Wahle hei
Und fingt i sim Garte ä riesige Stei.
Är studiert ganz lang, da wird ihm klar:
Das isch itz äbe z'Einsteinjahr.

Wie me am Einstein si Theorie cha verstah,
Zeigt das eifache Bispiel da:
Der Blair isch zwar blöd u primitiv,
Doch im Vergleich zum Bush nur relativ!

Kürzlech im Piry seit mi Frou:
„Dert blüetet eine wie ne Sou.“
Ig luege o u gseh scho gli:
Das muess der Polo Hofer si.

Das da isch ä ächte Klee.
Aber das heit Dir ja vo wiitem gseh.
Är isch genau so ächt – mir wei niemer schone -
Wie am Hansjörg Wyss siner Millione.

Vor em Bundeshus fragt mi mi Schatz:
„Wie gfallt dir der nöi Alexanderplatz?“
„Ja der Platz als Platz würd mir scho gfalle,
Nur het es viel z’viel Wasserfalle!“

Der Carell het Bärn vo Härze gärn,
Drum verpflanzt är sini Härzli z’Bärn,
Anstatt z’Züri umezpfurre,
Dert verpflanzt me nume Zürrischnurre.

Uf em Rathausplatz äs grosses Loch:
Vier Meter tief, das längti doch,
Für Rueh und Friede z’garantiere,
Würd me der Fuchs samt Chare drin parkiere!

Mi Frou het der Blocher i d’Schüssle ghänkt,
Ig preichi de besser, het si dänkt.
Das isch tatsächlech so, s’liegt i mir Natur,
Und isch ersch no ä Bitrag zur Kultur.

Dre Aelxndear Tcähspäpt
Wrid neöi Stdatspäridät.
Nach em Blonde Bär – mir si schockiert –
En Ananalphabet, wo d’Stadt regiert!